


Krismasni Boksisrang

Ajit K. Ruram

KRISMASNI BOKSISRANG



Ajit K. Ruram

Published by :
D. J. Publication
Educational Publishers
Ringrey, Tura - 794 001
West Garo Hills (Meghalaya)

© Copyright reserved by the Author
First Edition : 2013

Price : ₹ 60/- (Rupees Sixty only)

Sole Distributor :
Students' Book Emporium
RINGREY, TURA
West Garo Hills, Meghalaya

Printed at : **North-East Printing Press,**
South Sarania
Ulubari, Guwahati-7

AGANCHENGANI

Krismasni salo an·tangtangni ka·sabegipa manderangna Boksirangko on·grikanicara namen nambegipa dakbewal ong·a. Ia nambegipa dakbewalko salaramni gonokrangni Jisu bi·sana an·tangtang a·songni gamchatbatsranggipa Boksirangko ra·bae on·nako daksningbaengagita nika. Rongtalgipa Sastroo indake serika gnan: “Aro uamang nokningchi nape uni ma·gipa Mariam baksa ua bi·sako nikaha aro an·tangtangni gam donchakanirangko oe on·nanirangko, sona aro kunduru aro murko on·naha.” Matti 2:11

Uamangni krabee dakako daksninge an·tangtangni ka·sabegipa manderangna bilsokatangtanggita Krismasni boksirangko on·gipa aditasak manderangni gimin anga ia chonbegipa kitapo mingbonga mangmang Kitcharangko segataha. Ia Kitcharango segatgimin obostarang, biaprang, bimingrang, aro chatchirang saniba ong·a obosta, chatchi, biap aro bimingrang baksa apsan ong·gakode angko kema ka·pachina gisik ka·tong gimikchi mol·molatpaenga.

Ajit K. Ruram

CONTENTS

1. *Mugani Dakmanda* – – – 1 – 8
2. *Gitcham Tebil Cloth* – – – 9 – 17
3. *Saksa Moral* – – – 18 – 27
4. *Sonako Chatgipa Sampil* – – 28 – 36
5. *Sadusa Sakgni* – – – 37 – 45

MUGANI DAKMANDA

AJIT K. RURAM

Tura songjinmaoni mail bongamang chel·gipa damsa songo Silme Chambugong Marak minggipa saksa randi me·chik uni ma·gipa aro sakgni bi·sarang baksa songdongpaengachim. Uni depanteko Seng·gan aro demechikko Ring·me ine mingachim. Seng·gan bilsi chet aro Ring·me bilsi dok ong·engjokchim.

Segri pagri brange dongengomangba ua an·tangni bi·sarangko namgipa skulo poraiatna sikbeachim. Bi·sarangko poraiatna maming cholba dongjani gimin ua me·su samjakrangko badingna a·bchengaha.salanti neng·skime bimchipachi gong·sa gong·ni mandapgipa tangkarangko chimonge ua bi·sarangko Mission skulo Seng·ganko class III – o aro Ring·meko class I – o biming segate on·na man·paaha. Uamangni song sorok sambaon ong·ani gimin bi·sarang bus gario gae re·ange skul nokni sepangon ong·onrikna man·naiachim.

Ma·gipa salantian uamangna gari bharana aro misal bree cha·china ine tangka gong chi·gnikode on·natrongachim. Uandake uamang adasa Tura songjinmani Mission skulo poraina a·bachengaha.

Salsao sakgni me·chikmarang uamangni songona ba·ra palna re·angaha.”Dakmanda, Daksaria, aro mugani ba·rarang gnang, ra·genma ano?” ine uamangni a·tlao inwateaha.” Chingade cholgri apgri, tangka paisaba dongpaja, dakmanda daksariako ba maichi brepana maichi srepana,” ine Silme aganchakaha. Unon “Nianide dam nangjawa ano,” ineming daksaria aro dakmandarangko kingsa kingsa dake badaleming unaganate mesokaha. Uarangoni kinggnide uni an·gilna krabeachim. Gimikko badale mesokman·nani ja·manoba da·o kadepsa dongengpittichim. Ua kadepako jaksi ote, “Uara maisa,” ine Silmeni sing·on,”Uade Mugani dakmandasa, aro damba rakbea,” ine aganchakaha.” Na·simanganba nianide dam nangjawa ine aganaba, uni gimin ukoba mesoksrangbo,” ine inon, ka·dingsmite, “De indide iakoba niriksrangbo,” ine aganeming ukoba badale una ganate mesoktaiaha.Ia dakmandara damni kri silbebeachim, aro uni an·gilnaba krabeachim. Uko gane Tura songjinmachi roangodearangba uko sakgni bi·sarangni ma·gipa ong·aha ine aganoba bebera·jawachim. Maina uni kambe dimrima, an·gil sakgitchak, kni

simchirikrikdake chamila aro ki·sangteko pindape ro·e silbeachim.Uni mikkang silbeana aro bimang daknangana bateba uni cholon-bewalo maming ong·siani dongijanian nitobatachim. Uni giminan segipani siani salon uni maharirang bi·gakao sokchuna pangpikao miksonge uni jongsarigipakon amsikon sengtimatahachim aro purako cha·rimatahachim. Indiba,angse appani ka·bak kurio dongtaie anga kusi ong·e an·senge dongoba Isolni ka·saachiangna pattigimin hirokna-muktanaba bate gamchatbatgipa angni sakgni bi·sarangko angse gital duk on·jokode angna namen dukni salrang sokbanaba gnang ine chanchieming ua segri pagri aro kangal cholgri ong·emangba bi·sarangnimikkangko nie an·tangko ka·dimeate brangemangba dongaignok ine ua gisiktango miksongaiaha.

Ua Mugani dakmandako mikchabeachim, indiba uko brena gita uni jako tangka grichim.Maina uni dam tangka gong hajalgni ong·achim. Ba·ra palgiparangni noksulchi re·angako ua bilara sokja ka·ara amjadake nirikaiaha. Ma·gipani ua Mugani dakmandako man·a sikbee uko palgiparangni noksulchi re·angako ku·chi minok bika rim·rok dake nirikako nikon bi·sarang una ka·sachakbeaha aro gisiko duk ong·tokbeaha.” Apa sagi tangkuengode je cholchiba ia dakmandako amana bree on·chongmotgenchim,” ine uamang pagipa sagina sintie grapaha.

Salgipino skulchi re·angon uamangni skigipa salaram a·songoni re·bagipa, askirangko nie poraina changgipa manderangni a·songtangni gamchatbatsranggipa gamrangko ra·bae Jisuna boksisi onani kitchako aganaha aro ia kattarangon pangchake aro uko ja·rikon an·ching Krismasni salo ripengskarangna boksirangko on·ronga. Uni gimin Krismasni salo sanaba boksisi on·ode nambatsranggipa bostukon boksisi on·a nanga ine uamang skiako man·aha. Uni gimin uamang adasaba ma·gipana nambatsranggipa boksisko on·a miksongaha.

Adita salrangona kingking uamang ma·gipana Krismasni salo boksisi on·ani gimin chanchibeaha. Bon·kamao ma·gipani mikchabegipa Mugani dakmandakon una boksisi on·a miksongaha. Da·ode ua dam rakbegipa dakmandako brenagita tangka chimongna uamang chanchina a·bachengaha.

Skulchi re·angmitingo bang·bata salrangon uamangoniko gari bhara ra·rongjachim. Batesa saoba gisik gnanggipa manderangde uamangni skulchi re·na bimchipako nika·sachake maikoba bree chabo ineming gong·sa gong·gni dake tangkarangko on·rongachim. Ua tangkarangkong ma·gipani salanti onatronggipa tangkarang baksa sriksrik chimongna a·bachengaha. Saljatchiode uamang misal miwal gri roe salrangko re·atna a·bachengaha. Una agreba skul

jokmano nokchi mail bonga buringni ramako adasa ja·achi rebarongaiaha. Nogipa neng·a amchakjaode adatang batome rimbarongaiachim. Basakobade matburingrangnaba kene katna nangachim. Wachio mikka jiman salrango uamang namen duk manbeachim. Jegita duk chakeba amana ua Mugani dakmandako brena man·a nangchongmota ine gisiko miksonga gnang uamang okriakoba, wachi chakakoba matburingna kenakoba aro salanti nengskime ja·achi re·akoba kadingsmite chaken ranta ongpilaiahachim. Uamang indakpile duk chakarangni gimin ma·gipa aro ambigipa mamingkoba uijachim.

Ma·gipako kusi ong·atna miksongen uamang porainaba bimchipbeaha. Uandaken bilsini porikakoba sea matchotaha. Porika kna·atani sal sokbaaha aro un salo ma·a parangkoba skulchi reangpachina gita principal mol·molataniko dakataha. An·tango namkala ganachinani dongpajani gimin Silmede kratchae re·na sikipajaengachim. Indiba bi·sarangni mol·molbeani gimin duk ong·atna sijkjaeming je dongakon gane chine uaba bi·sarang baksa skulchi re·angpaaha.

Ma·a parangko mikkango asongataha aro Silmeba kratcha·omangba mikkango asongpaaha. Uni gandingan pilakna bateba ong·sibatachim. Principal porikako knaatna a·bachengaha. Pass ka·gipa bi·sarangni ma·a parangde kusi ong·tokaha, indiba

fail ong·gipa bi·sarangni ma·a parangde duk ong·aming kratcha·aming daktokaiaha da·nang. Ka·sne ka·sne porika knaatroroen class 3 ona sokbaaha. Angara kratcha·atako mangelma ma rasong on·ako manpagenma ine gisiktango chanchimitingon principal ka·dingsmite, “Class III-ode skanggipa biapko Seng·gan Chambugong Marak man·aha,” ine aganataha. Unon ma·gipa Silme kusi ongani gimin an·tangni mikronrangoni kusini mikchi jo·olangakon uipiljaha.

Uni jamano, class 1-o Ring·me Chambugong Marak skanggipa biapko man·an baksana skul gimikoba skanggipa ong·aha, ine aganeming ma·gipako mikkangchina okamate uni bi·sarang baksa chadengchapataha. Silme gisiko kasroka amchakjae jinmani mikkangon degiparangko gipake ku·dime grapsrangaha. Uko nike pilakan kusi ong·chake mikchi ong·tokaha. Uni jamano principal aganangkuaha, “Ia bi·sarang namen gisik gnanggipa aro poraina bimchipgipa bi·sarang ong·a. Indita diltubegipa burungni mail bonga ramako bilsu gimik ja·achi re·ruraeba skul gimiko skanggipa biapko man·aniara uamangni mikkangchi dal·anggniko mesoksoa.”

Principalni aganarangko knaon ma·gipa aiao inmanaha. Maina ua salantian uamangna chu·ongagita tangkarangko on·natrongachim.

Maikaisauamang bilsu gimik ja·achi re·na nangaha aro angni salanti tangka gongchi·gni dake on·natronggipako ia bi·sarang maiko dake bon·nataha, ine ua gisiktango chanchibeaha.

Bi·sarangni poraina bimchipako nike ma·gipa kusi ong·beaha. Uni gimin ua uamangna Krismasni attamo gital chola ba·rarangko boksisi on·naha. Ma·gipani boksisi on·gipa chola ba·rarangko gane chine nimitingon Seng·gan agane inaha,” Na·simangnaba chinga Krismasni boksisirangko ra·bara.”Unon Ring·me ge·gni dingtang dingtang kadeparangko ra·bae ge·sako ma·gipana aro ge·gipinko ambitangna on·naha. Ma·gipa kadepako opraake nion jagokman·pilaha aro ua mamingkoba aganna changpiljaha, maina uan uni man·na sikbegipa Mugani dakmanda ong·achim. Ua bi·sarangko gipake ku·dime au – au grapsrangaha. Uamang an·tangna ka·sae uni man·na sikbegipa ua Mugani dakmandako brena miksonge bilsu gimik mail bonga buringni ramako ja·achi skulona re·ruraaha. Da·osa ua Principalni agangipa kattarangko name ma·siaha. Bilsu gimik misal miwal gri, janggitangtangko on·kangpile, duk chakstape tangkarangko chimonge an·tangko kusi ong·atna ia dam rakbegipa Mugani dakmandako bree Krismas boksisi on·nako chanchitaitaie nion ua gisiko ka·srokbee grapbeaha aro bi·sarangna ka·sabataha.

Bi·sarang ma·gipani grapengako nikon uni
mikchirangko usite uko gipakkotkote ku·dimaha.
Salgipino Silme bi·sarangni kasae Krismas boksis
on·gipa Mugani dakmandako gane giljachi re·angaha
aro unsalo uan songgimiko kusi ong·batsranggipa
ma·gipa ong·aha.

Seng·gan aro Ring·meni skulo ma·gipani skoko
de·doani gimin aro uamangni una ka·sae dakgipa
kamrangni gimin songni manderang uion namen kusi
ong·chakaha aro “lamangsa ma·ani dee rang
chong·mot da·nang,” ine intokaha. Plakan uamangni
nambegipa dakbewalrangko nike uamangna
ka·sabeaha.

Uamang adasaan ambitang aro ma·gipani
pattianiko man·nan baksana Isolni pattianiko man·ne
Principalni niksamsoe aganagitan poraianio chu·soke
dal·gipa manderang ong·bebeaha.



GITCHAM TEBIL CLOTH

Bangla Deshni skotong songjinma Dhaka songjinmao Sudhir Rangsa minggipa saksa mande gnangchim. Ua Dhaka University - o Geography subjectni saksa Professor ong·paengachim. Uni jikgipako Purnima Azim ine mingachim. Ua saksa wagamni doctor ong·achim. Uni jonggipako Rimbang Azim ine mingskaachim. Uamangni ma·a aro pa siahani gimin ua abitang aro gumetang baksaan dongpaengachim. Ua Dhaka Universityo Msc. ko poraiengachim.

Sudhir aro Purnimani bia ka·aoni jagittam mangmangsan ong·aiengpittichim. Uni gimin uamangni ka·sagrikaniko kan·dike aganode, kisian sengja aro jujaan pengja dakaengpittichim. Uamang jiksesean jonggipa Rimbangna namen ka·sabeachim.

West Pakistanode Urdu ku·ukosa agana, indiba East Pakistanni manderangko chugimik jakgitel ong·srangna ine Mamong sorkari baksa dakgrikaniona dilangaha. Ia dakgrikanio a·songni me·asa sakantian bak ra·pana nangaha. Uni giminsa

Sudhir aro Rimbangmang gumesaba Mukti Joddhya-o (jeko pe-skaon, "A-songko jakgitel ong-atna sorkariko dakgrikchakgipa sipai." Ine ong-a) napangna nangaha.

Dakgrikani bilongbatroroaha. "Anga attamon re-bapilaigen," ine gumetang aro abitangko ja-o rim-e salam ka-anijamano abigipani uko gipake ku-dime watataonin Rimbangde jasa ong-engomangba nokona re-bapilkujachim. Unochachaan India aro Pakistan dakgrikna a-bachengsrangaha. Dakgrikram a-ba damantion Indiani sipairang cheroroangaha. "Angade intang walon re-bapilaigen, na-a simsake dongbone," ine agane jikgipako gipake ku-dime bolsa chandalko kebite Shudir nokoni ong-katangaha.

Indiaba dakgrikani bilongbeani gimin ua noktangona re-bapilna chol manjaha. Uni walon dakgrikani bilongmanchaengaha ine nikon sakantian janggitangtangna katbrangtokaha. Purnimaba ua walon sakgipinranggita janggitangna katbrangpaha.

Antignina kingking bilonge dakgrikani jamano Pakistanni sipairang an-tangtangni silchidarerangko Indiani sipairangni mikkango galontokaha. Uan dake India sorkarini dakchakanichi East Pakistanko jakgitel ong-ate uko Bangla Desh ine mingskaha.

Tange dongspagipa manderangko gital sorkari chimongon Sudhir, Purnima aro Rimbang saksa

sakgipinko gronggriktaijaha, maina uamang dakgrikmiting somoio Indiani dingtang dingtang biaprangosa kanape dongeachim.

Dakgrik dingrikmiting somoio Dhaka songjinmani badiaba biaprangde ripik kning dakpilaijokchim. Bang'a manderangan biaptangtangkon ma'sipiljaha. Rasong grianichi Sudhirmaang nokba ua dakgrikanio gimapaaha. Adita jarangni ja'mano ua jikgipa aro jongsari gipako grongengarok ine ka'donge Bangla Desh chi re'angpilaha. Dhaka songjinmaona sokeon ua nokkaptangkon uipiljaha. Uamangni nokkapo te'sa dal'begipa aro chubegipa sorkarini godam nokkosa nikeskaaha. Jikgipa aro jongsarigipani gimin ua maming koborkon man'jaha. Uamangko grongna kadonge re'angara duk – mikchini sagalosa gitchosrangaha. Ua plakkon gimate duk mikchi baksa saksan janggitangna a'bachengaha.

Sudhir gitan Purnima aro Rimbangni obostaba ong'aiaha. Uamang sakgittaman saksa sakgipinna ka'pakgrike janggitangtangna ga'brite cha'na a'bachengaha.

“Dakgrik dingrikmiting somoio angsede apade achakgita menggogita buringonma rama a'changoma sibebaijokkon gose. Angjongkoba saoban goe galjokma bobilrangan ukoba ka'namgija dake sasti

on·stapesa so·ote galjokma," ine uamang gumesana ka·pake ka·oksie walantian mikchitango jroesa uade salrangko re·ate janggitangna a·bachengaha. Basakobara bimangko nikna gitik aro basakobara ku·rangko knana gitik dakmanaiaha da·nang.

Rimbangde pangpang abitang aro gumetangna ka·paken basikba salrangona kingking cha·gija ringgija kalime dongen ram·si ram·deng dakpilaiaha danang. Uni duk ong·e dongengako nike saksa Missionary una ka·sachakbeaha aro uko noktangona rimange detanggitan ka·sabbee uko Theology College—o poraiataha.

Uamangni ekgrikaoni bilsu kolatchi ja·mano Dhaka songjinmani samsa noksiko dakgrikani somoio be·grugimin te·sa gilja nokko rikpiltachina aro ua jolo dongkuenggipa bebera·rimska manderangko sandi mangamchina miksonge saksa pastorko uanona watataha. Ua pastor an·tangni jikderangko rimbite ua jolon te·sa nokko bhara ra·e dongeaha. Bimchipbee kamka·anichi ua saksku bebera·rimska rangko sandie chimongna man·paaha. Ua mangni dakchakanichi ua begru gimin giljanoko rikpiltaina a·bachengaha. Krismasni sal sokna skangan uamang giljanoko rikpiltaina krengbeaha. Uandake December jani 22 tarikon uamang plak kamrangko matchotaha chim, indiba dukni katta ian, salgipino mikka balwa ta·rakbeaha aro giljanokni

nokking selahani gimin pulpitni janggilchipakni pakma reppigipa jatchi tongtong rurongaha. Balwa mikka ta·rakani jamano Pastor salgipinni attamo Krismas salko manina miksonge gilja nokko tarina re·angon pakmako repigipani rurongako nike gisiko duk ongbeaha. Duk ongbee noktangchi re·angpilmitingo ramao damsas antiko re·pakangengachim. Unon ua dukrangko gualatna miksonge uano dondikaha aro antiko re·roroe nina a·bachengaha. Ua antini damsas noksiko kingsa nitobegipa tebil clothko saksas mandeni badale palengako ua nikaha. Ua tebil cloth giljani ruronggipa pakmako pindapna namgen ine nike ua uko breaha. Ua tebil cloth ko ra·e gilja nokchi re·angpile ua ba·rako badale pakmako pindapna jotton ka·beengachim. Uan attamni 10:00 (chikking) baji ong·engjokchim.

Gilja nokni sambaon saksas butchuma noktangchi re·pilna city-busko sengsoengachim. Da·si salo mikka balwa ta·rakbeahanigimin uni attamo sin·beachim. Uni gmin ua butchuma gilja nokni do·ga oengako nike nokningchi nape asongaha. Pulpitchiko niaton Pastorni saksantangtang nitobegipa tebil clothchi pakmako pindapna jotton ka·beengako nikataha. Ua ka·sne ka·sne pastor ni sambaona re·angaha. Ua sengnapgija dake ua tebil cloth ni gimin sandiaha . Bilsis kolatchi skang ua ia

tebil clothko jaktangchi koachim, indiba dakgrik miting somoio ua noktango gale katna nangaha ine kan·dike agane ua donaiaha. “Ia tebil cloth nang·ni ong·ode na·an iako ra·angaibojok “,ine Pastor ni ka·sachake aganon ua uko gilja nokna jakkalchinan donangaiaha. City-bus dongjahani gmin ua uko an·tang gario gate uni nokona sale doneaha. Walo ong·ani gmin ua butchumani mikkango rongtale ma·sijaha.

Salgipinni attamo Krismasko maniaona bebero·rimskaarang an·tangtangni ripengskaarango rime re·batokaha.Pastor Krismasni gmin on·tisa aganeming Sastrooniko adita podrango poraie boksirango suale on·naha.Indiba saksa budepado·gachol sambao asonge gsik nangbee Pastorni aganarango knatime aro uni mikkango dongengipanade boksik tikchangaha.

Program matchotmano plakan noktangtangchi re·angtokaha.Indiba,Pastor,uni jikgipa aro ua budepa, uamang sakgittamde gilja nokoni ong·katkujachim. Unon ua budepa Pastorni sepangona re·bae ua ia tebil clothko baoniko man·na ine singaha. Antioniko brea ine ua aganchakaha. “Bilsi kolatchi skang ia tebil clothko angni jikgipa jaktangchi koachim,indiba chinga iako jakkalna man·srapjajok, maina dakgrikani a·bachengaha aro chinga obostachi ekgrikatako man·naha. Da·alona

kingking chinga saksa sakgipinko grongtaikuja. Ua siahama ma tangkuengama ukoba anga uija.” Ia kattarangko aganmiting uni ku·rang be·aha aro uni mikronrangoni mikchirang srusru dake jo·olbana a·bachengaha. Uni dukni kattarangko knaon Pastorba ka·suangsuang dakangpilaha. Maina uaba dakgrikani somoion abitang aro gumetangoni ekgrikatako man·nachim.

Gumetang aro abitang baksa dongmitingo ua mamingnaba simbrana nangjachim. Ama appa grioba abitang aro gumetangni salakimo dongakon ua Rong·mako danil pa·agita aro giting bolmao salakkim chakagita daknikaiachim. Daalo ua budepani jikgipana ka·pake ka·oksie mikchi chiwaring jolpile sinteako nikon ekgrikani dukrangni a·sel bilsi kolatchina kingking ka·tong bnekpile skanae dongengipao karisim pudape uko saknatbatata gita dakaha. Uaba mikchitangko rakatna amjaha.Ua budepako janggilate mikchitangko u·sitaha.Bilsi kolatchina kingking abitang aro gumetangko grongjanigimin ua uamangni mikkang, bimang aro ku·rangkoba gualpilaha.Ia budepaan angni gume ong·ama bia ineba ua gisiktango chanchiman·pilaha. Indiba sing·chrake ninaba ua ka·dongskajaha.

Ua mikchitangko rakate budepana aganaha, “Da·al attamo ia gilja noko Krismasko an·chingni maniao nang·na boksis tikjanigimin anga namen duk

ong·beaha, indibana·a ontisa mangmang duk chake chingbaksa re·pana namnikode anga nang·na mingsa nambegipa boksisko on·genchim.” Unon ua ontisa jajaa gnang, ‘Reaigen’ ine aganeming Pastor aro uni jikgipa baksa uamangni gario gae re·angpaha.


Adita ru·ute re·ani ja·mano uamang te·sa nokni mikkango gariko dondikaha. Garioni ongone Pastor do·gako doktikon saksa butchima do·gako oe, “O, Pastor, na·simangsa,” ine aganmitingon ua rang·sanana, “Daal attamo chinga nang·na mingsa nambegipa Krismasni boksisko ra·baenga,” ine aganskaeming ua budepako sepangona okamatha. Budepa sepangona re·baon uko jaksi ote “Naa ia mandeko uia ma uija,” ine sing·aha.

Wal·janggini jasengao uamang saksa sakgipino adita ru·uten aio inmanpile nitat grike dongaha. Uni ja·mano saksa sakgipinko uigrikon uamang gipakgrike kusi ong·e sigimin bon·giminna ka·gale ka·oksie grapa gita au – au dake grabeaha.

Ru·ute gipakgrike grapani ja·mano mikchitangtangko u·site pastor aro uni jikgipako nokningona rimnapaha. Uamangko asongchina aganna skangan budepa agane inaha, “Ian angni jikgipa Purnima Azim aro angara Sudhir Rangsa.” Budepani aganako knaon Pastorba an·tangni chanchichipaan on·gchongmota ine nikaha, aro,

'Gume' ine uni ja·arangko rim·e salam ka·ani ja·mano butchumako 'Abi'ine uni ja·arangko rim·e salam ka·na dakon uamang sakgnian aiao inmanpile uko nitate apsan 'Jong Rimbang' ineming uko gipake ku·dime kusi ong·e graptaiaha.Da·osa a·rakni somoio mikka jimbee waatani ja·mano samsi rangni tangsekgilgil dake ritima gita bils kolatchina kingking ekgrikani dukna sichetgimin ka·tongrango katcha·ani aro ka·srokani bimik nabaaha.

Kusini aro ka·srokani mikchirangro u·site galmano uamang nokgipa Isolko mittele kusi ong·bee Krismasko maniaha.Uamangni janggi tanga gimiko ian kusi ong·batsranggipa aro ka·srokbatsranggipa Krismas maniani ongaha. Bils kolatchina kingking ekgrikgimin ka·sagiparangko man·piltaianian uamangna nambatsranggipa Krismasni boksirang ong·aha.



SAKSA MORAL

Tripurani badiaba damsa songo saksa segri pagri brange dongenggipa me·chik an·tangni saksakamkam depante baksa songdongpaengachim. Uni depanteko Jonggin A·dima ine mingachim. Ma·gipani a·jak a·gil ra·e jawa rango nokkol nape alduako cha·e ua songtangni Higher Secondary Skulon class XII – o poraiengachim.

Salsao ua sriksrik sakgipinrang baksa Agartala songjinmachi katangpaaha. Bikmatangko gapatnagita chona rema kamrangko sandie nion saksa ba·ra kancharangko badinggipani dokano ba·rarangko paltimani kamko man·paaha. Dokano donge ba·ra kancharangko paltimen badingani budiko ua skie ra·aha. Bian gipinrangna bate paltimna changbatsranggipa ong·aha.

Jaanti nokgipani an·tangna on·timinti on·ronggipa tangkarangko ua chimongna a·bachengaha. Uandake bilsa bongana kingking bara dokano kam ka·ani ja·mano bia an·tangan damsa biapko ra·e uano ge·sa chonbegipa ba·rani dokanko

a·bachengataha. Ba·ra kancharangko pale salanti gong·sa gong·gni dake man·dapgipa tangkarangko ua chimongroroaha. Ka·sne uni dokan dal·batroroaha.

Jonggin saksa kargalni bi·sa ong·ani gimin tangka paisarangko jakkalna changbeachim. Uni giminan ua ba·rarangko badingao cheroroaha aro Agartala songjinmao ge·sa dal·begipa ba·rani dokanko songataha.

Nokgipa Isolni pattianichi songjinmani jatchion clamsa biapko bree uano ua te·sa nitobegipa nokko rikaha aro ua nokko “Jonggin Bhavan” ine mingaha. Nokko rikmanani adita jaarangni ja·manon ua Rupali Ghagra minggipa saksa silbegipa aro skia man·gipa nomilko bia ka·aha.

Adita bilsirangni ja·mano uamang sakgni demechikrangko man·paaha. Ua mangba ma·gipagitan silbeachim aro uni nambegipa gunrangko man·rikpaachim. Uamangni nokdango maming duk jajrengani grichim. Pringo aro attamo nokgipa Isolko mittelani ku·rangrangan nokgimikon gapgimikaiachim. Jonggin an·tangni jikgipa aro demechikrangna namen ka·sabeachim. Uni jikgipa aro uni demechikrangba uko mande ra·beachim aro una ka·sabeachim. Uandake ua chonbegipa nokdango salgini rongtalgipa ka·saani balsri balako rang·sitman·pilachim.

Sinti skimani gri Isolni pattigimin rongtalgipa ka·saani salakimo dongakon diabol namnikjabata. Mamingnaba simbragija dongengmiting somion Isolni manderangko dilsretna diabol chilrangko man·ronga. Jongginnaba indake ong·aha.

Chu·ongana bate an·tango tangka paisarang dongani gimin ua jajrengman·gija dam rakbegipa chuko bree ringna a·bachengaha. Ka·sne ka·sne ua ia namgijagipa dakbewalchi kaako man·nangroroaha. A·bachengode ua sriksriksa ringaiachim, indiba da·aode jik deerangni mikkangon an·tangko uipilgija jara dakpile ringna a·bachengaha. Jikgipa grape grape uko mande ra·bee ringako dontongchina beng·on ua uko dokna a·bachengaha. Uandake ua salantian ringe – chae nokona rebae jik – deerangko dokruru dokbrange sasti on·na a·bachengaha. Je nokon salantian salgini rongtalbegipa ka·saani balwako rang·sitman·rongachim, da·ode ua apsan nokon norokni wal·kukosa chakna amsokpil·jaengjokchim.

Jongginni jikgipa aro demechikrang una namen ka·sabeachim. Ua churing chupeke nokona re·bae an·tangtangko dokruru – dokbrange duk sasti on·noba uamang uko mande ra·beachim.

Krismas sokna da·ao antيسانjokchim. Manderang Krismasni salko manina ma·manti tarisoanirangko dakengjokchim. Jongginni ba·rani

dokanoba ba·ra – kancharangko brena re·bagiparangan spekspek dakpilaengjokchim. Uni jikgipa aro demechikrangba pagipani nitobee rikgipa nokko nitobatatna tarian jakchaktokjaengjokchim. Sakantini ka·tongon katcha·ani aro ka·srokanian gapaahachim. Indakmiting somoion, attamsao Jongginde chu peke nokona re·baha. Jikgipa aro demechikrangni jakchakpil·gija nokko nitobatatna kam ka·engako nikeon ua an·tangko mande ra·soja birong chansoja ine pa·sike jikgipako ge·sa dal·gipa go·olchi dokna a·bachengaha. Jikgipa uni dokarangko aro tingbrangarangko chakna amjaha. Ua sibokpilaha. Ma·gipako sibokpile dokako nikon dal·gipa demechik ninapjae ma·gipako ganggopna dakengon ukoba uni jakpongko be·tongpile go·olchi satpretataha. Ukoba chu·ongnikjae siboke dongenggipa jikgipakoming jakpong be·gipa demechikko salrurue ga·ting a·palchi galatsrangaha. Ma·gipa aro abitangko matchu – do·bokrangko gita dokstape roako nikon chonbatgipa demechikde kenjagokeming ku·ma ong·pilaha. Ukoba achak – menggo bi·sako gita a·palchi gibrangatsrangaha.

Sibokaoni mikselon ua an·tangni saknaarangkode gualpile bi·sarangko gipake grapbeaha. Dal·gipa demechikni jak be·ako aro chongipani kenjagoke ku·ma ongahako nikon ua duk ong·dugae siboktaiaha. Uamangni be·enrang aro

ka·tongrangni saknaarangna grapengako nike saksa me·chikma uamangna ka·sachakbeaha aro segipani dakchakanichi uamangko sepangbatgipa hospitalona rimange donbaaha.

Jonggin Moralko Agartala songjinmani manderang namen uitokachim. Maina ua songjinmao man·ne cha·gipa aro donge rogiparangoni saksa ong·paengachim. Uni jik – deerang pagipani duk – sasti on·stapako man·ne songjinmani ong·sibatsranggipa hospital donge sana – bananiko man·nengako songbad rangko setimgiparang salgipino songbadrango segatataha.

An·tangni jara dakako songbadrango segatako nikon ua kratcha·beaha. Ua dokanchi re·angna ka·sokjaha. An·tangni gisikgri dake kam kaani gimin chanchiate nion ua duk man·beaha. Anti gimikan ua nokoni ong·katna pa·jaha.

Chu pekaoni mikselosa an·tangni dakgualarangko ua ma·sibaaha. Songbadrango an·tangko chonnikchepchep searangko nikosa ua jadasikpile kratcha·beaha. Jikgipa aro demechikrangni attamanti an·tangna Isolo bi·chakarangko ua gamchatnikjachim. Indiba da·aode ua uarangko masina a·bachengaha. An·tangni dugapile namgija daka kamrang Isolni nikanio agrepilaha ine ua uiaha.

Anti gimik noko saksan sikdidik dongengmitingo uni gisik aro ka'tongo paptangna duk ong'e gisik pil·lani bimik nabaaha.

Ba·ra – kancharangoni moilarangko chi aro sabonrangchi susranggo talata, indiba ka·tongni moilarangde mikchirangchi susrangosa talskara. Jonggin Moralnaba indaken ong·aha da·nang. An·tangko jik dongoba jik donggija gita aro deerang dongeba de ba·gija gita dake saksan tangtang mikkgronrangoni mikchi ritok ritok ga·akarangko uipilgija ua indake chanchina a·bachengaha.” Angni jik – deerang angko mande ra·beachim aro angua namen ka·sabeachim.”Nokona sokbaon Nonode, “Baba, angna maiko rabara,” ine chasorongaiachim aro angkogipakkorkote kurdimrongachim. Nono dal·gipaba angko niksoarin ringani chiko freez – oniko ra·e, ‘Baba chi ringchengbo,’ ine on·neming angko mande ra·bee angni ja·arangoni ja·koprangko oke uarangko ja·kopui brasschi nate donatrongachim. Angni jikgipade pangpang niksoarin au·niksuanikosa dakatchenge gansre - chinsreanirangko matchotatarin an·tangni ga·subee song·e chane donsogipa mi – samrangko dongtime midine chikane on·nanirango on·timin·tiba sretrongjachim.Anga an·tangko saksa raja gita chacha daknikman·pilachim. Aiao inmanpile uamang angna ka·saachim.Indiba anga uamangni rongtalgipa

ka·saaniko ga·belbele chonnike roaha. Anagni namgijani aro gisik gri dakaniara angna namen dalbegipa gualani aro gimaani ong·skaaha,” ine chanchieming ua walgimik grapbeaha aro mikchi tangchirangchi an·tangni gaoradea, jara daka aro plak namgija moilarangangapgipa ka·tongko susrange galaha.

Bika a·dram be·e mikchi chiwaringo jroe anti gnini ja·mano ua Isolo bina abachengaha. “O salgio donggipa appa Isol, angade mandeni gadangoni namen onbegipa gadangona ga·akon manjok, angade mande ong·pajajok, indiomangba, O ka·sabegipa Gitel, mangsa sigimin achakko gita mangmangba angko gisik ra·patkubo,” ine bi·eming ua saksa chonbegipa bi·sa gita bi·na changpilgija au – au dake grapsrangaha. Mikchirangko u·site gisik nangbee ua Isolo bi·angtaiaha.”Angni jik dee – rangde maming dosko dakjachim, angasa uamangko duk sasti on·stapaha, uamangko gisik ra·pabo Gitel, aro uamangni saknaarangko namatbo. Ang gita matburingni gadangnaba onbatgipa gadangona tang·on man·gimin, gisikgri aro a·kirangdapni bewalo janggi tangenggipa kema ka·ani gisikko uamangna pattipa·bo, ine ka·sabegipa aro jokatgipa Gitel Jisu kristoni bimungo anga papi mangnamgijabatsranggipa bi·a, Amen.”

Uni jikgipa aro demechikrangba pagipana ka·paken an·tangtangni saknaarangkode gualpilachim. Salantian uamang duk – mikchi baksa una Isolo bi·chak jringengachim. Uamangni pagipana kasaan uni plak namgija daka kamrangkoba pindape galaiaha. Chongipa demechikde basako anga Babako gipake ku·dimna man·taignok ine salang walang pagipana simbrabee dongaengjokchim.

Mandeskana krat cha·oba jaksi chikoba krismasni attamo, manderangni Krismas salko manina jakchakpil·gija noktangtango tariengmitingo ua saksa cha·ukrokgita hospitalchi re·angaha.

Krat cha·aming aro duk ong·aming dake ua chonbatgipa demechikni biapona ka·sne ka·sne re·angaha. Bi·sako nikarin ua uko gipake ka·siksikpile grape, “Angko kema kabone Ama,” ine kema bi·aha. Demechikgipaba pagipako gipakkotkote uko ku·dimeming ka·siksikpile grapjoljole pagipani mikchirangko u·site galeming, “Baba anga nangna namen ka·sara,” ine aganeming uko gipakkotkote grapbeaha.

Uni ja·mano ua nonoko gipake dal·gipa demechikni biapona re·angaha. Uni be·tonggipa jakpongko doctorrang plaster ka·e donengjokchim. Ukoba gipake grape ua uno kema bi·on uaba pagipako gipakkotkote grapbeaha aro uko ku·dime,

“Baba anga nangna namen ka·sabea,” ine aganeming uni mikchirangko u·site on·naha.

Bon·kame ua jikgipan: biapona re·angaha. Uni bimang gimikon dokani parirangan gapachim. Be·en gimikon ong·nasipile ka·dapan – wendapan dongeng pittichim. Jikgipa uko niksoon kusini mikchirang an·tangni mikgronrango jingjeng jingjengdakengako rim·rikna man·jaeming hospitalni nokrao ritok ritok dake ga·akataha. Uni silmarang silkore mikkang bimangko mangrudamoni re·bagipa me·manggita saitangitasa nikmanpilaijokchim. An·tangko aiao inmanpile duk on·noba segipana uni ka·saania bon·changjachim. An·ti gimik seni – pani mikkangko nikjani gimin batesa ua una ka·sabataha. Ua ka·sabee an·tangni jakrangko bawange segipako gipaksoaha aro uko ku·dime, “Baba anga nang·na namen ka·sabea,” ine aganeming uni mikchirangko u·site on·naha. Ua ka·siksikpile grape jikgipaoba kema bi·aha.” Chingko nang·ni a·rikatmitingon anga nangko kema ka·ahaba,” ine aganeming segipani mikchirangko u·site galtaiaha aro uko ka·sabee ku·dimtaiaha.

Jonggin Krismasni attamo an·tangni ka·tongko chu·gimik Gitel Jisu Kristoni ja·ao rugalaha aro mikkangchi ua churing chupekani pal Isolko ollakiao pekskaaha. Ua toromo kimkim donge changsatai katchae kasroke jik – deerang baksa janggi tangrimangaha.

Krismasni attamo pagipani an·tangko Gitel Jisu
Kristona chugimik on·kangsrangnian uni jikgipa aro
demechikrangna nambatsranggipa krismasni Boksis
ong·aha.



SONAKO CHATGIPA SAMPIL

Englandni skotong songjinma London songjinmao Jimi Kartar minggipa saksa mande dongachim. Uni jikgipako Dela Kartar ine mingskaachim. Kangal cholgrini bi·sa ong·oba ua saksa silbegipa me·chik ong·achim. Uni knirang simchirikrik dake chamile ja·pa ki·tikona sokpile ro·achim. Knitom kajokode sko dotgni dongakon ine inmanpilachim, aro knirangko watbrake re·ode bugarani re·baengakon ine inmanpilskaachim.

Jimi badiaba damsa office-o saksa kerani ong·paengachim. Ua jaanti tangka gong 80/- (sotchet) kode beton cha·paengachim. Uamangni nokdango bi·sa-di·sa dongkujani gimin okkae cha·na man·pajaoba okgimude chakna nangpajachim. Saksa kangal Mandeni demechik ong·ani gimin Dela segipani chonbegipa betonko jakkalna changbeachim.

Pagipa sina skang Jimina ge·sa sonani packet ghoriko on·nangachim. Ua nitobegipa sonani ghoriko

ua ramram siliting chisa kae jakkalengachim. Sakgipin manderangni mikkangode ua an·tang jeboniko ghoriko raongkate somoi ninan kratcha·beachim. Maina uni ghorisonani ongoba uko kagipa silitingde maram cha·pilgipa ramram siliting·sa ong·aiachim.

Kam ka·ram biapo segipani an·tangni ghoriko jeboniko ra·ongkate somoiko nina kratcha·ako jikgipa namen uiachim. Indiba ua sonani ghoriko kana sonani silitingko brenagita uamango tangka chu·ongpajachim. Uni gminan ua bostu brea mingantikon mikgitchak pegitchak dakpile dam sikbekesa breeming gong·sa gong·gni dake tangka chimongna a·bachengaha.

Delani mikkang bimang nitobean baksana uni nitobee ro·begipa knirangan jajong jarambongni teng·sua nitobegipa golapni bibalrango teng·sudape uarangko nitobatata·gita gita uko plak me·chikrangna bate nitobatatsrangachim. Uaba saksa kangal cholgrini deme·chik ong·achim. Unigimin uni pagipa uni ro·begipa knirangko ken·china namkala ken·chongko bree on·na man·pajachim. Waklenggipa kenchong surichisa an·tangni nitobee ro·begipa knirangko ua ru·ute ken·ne tarie donrongachim. Jikgipani sampil surichi grapsi mikkosi dakpile an·tangni knirangko ke·ne roarangko nokon ua una ka·sachakbeaha. Uni gimin somoi jokan salrangode jikgipani nitobegipa knirangko ua ken·ne

on·rongachim. Indiba chol ong·pajani gimin ua una gital ken·chongko bree on·na man·pajachim.

Jikpipani suri batsranggipa kenchongchisa neng·e dike, grapsi mikkosi dakpile kni ken·nako nikon Jimi chanchibeaha. Beton bang·pajani gimin ua jikgipana ge·sa gital kenchongko brena sikbeoba ka·ara amja bilara sokja dake dongaiaha.

An·tang chol ong·pajani gimin jikgipako kusi ong·atna man·jae ua gisiko duk ong·beaha. Uni gimin an·tangan duk chakchengna nangchongmotgen ine ua gisik tango miksongaha. Ua salantian saljatchio misal cha·gija jikgipana gital sampilko brena miksonge tangkarangko chimongna a·bachengaha. Segipani salanti misal-miwal roe tangka rangko chomongengani gimin jikgipa mamingkoba uijachim.

Segipana krat cha·chaken uni sonani ghorina sonani silitingko bree on·na Delaba gisiktango miksongaha aro uaba salantian misal chagija tangka rangko chimongna a·bachengaha. Una agreba bostu brea changantian dam sikbeke breeming gong·sa gong·gni dake chimongrorona a·bachengaha. Krismasni attamo segipana sonani silitingko Krismas boksisi on·na ua gisiktango miksongaha.

Jikgipana ka·sabeoba aro una ge·sa gital sampilko bree on·na sikbeoba bilsa bon·nasiona kingkingan ua do·po de ba·aiaha. Uni gimin Krismasni

attamode je cholchiba ge·sa gital ken·chongko jikgipana boks is on·chongmotgen ine ua gisiktango miksonge jotton ka·stapna a·bachengaha.

Niksrapgijaan bils i bon·bebeaha. December jani 23 tarik ong·aha aro jikgipana ge·sa gital sampilko breani sal sokaha. Uni gimin ua an·tangni bils i gmik chimonggipa tangkarangko channe niaha. Uni chimonggimin tangkarang gimik gimang gong 70/- (sotsni) de ong·paaha. Office jokmano jako tangka gong sotsniko ra·bite, ka·dingsmite ua ken·chongrangko palgipa dokanona re·angaha. Ua sampilrangko nirorona a·bachengaha aro mongma wagamko tarie uano sonako chatgipa nitobegipa sampilko nito nikbate jikgipana krabatgen ine nike ua uko mikchabeaha. Ua uni damko sing·on uko paltingipa uni damko tangka gong 150/-(ritchasa sotbonga) ong·a ine aganaha. Ua ukon brena miksongaha. Indiba uni jako tangka gong sotsni mangmangsan dongaiani gmin ua uko brena amjaha. Salgipino ua ripengskarangoniko tangka srona bi·on Krismasni somoi ongani gimin darangba una tangka srona on·na sikjaha. Ua sampilko brenade da·ao tangka gong sotchetko nangdapkuengachim. Indita tangkarangko ia somoio banoniko man·gen? Ua duk mikchi baksa chanchibeaha aro bonkamao maming cholkoba nikchongmotjaenba pagipa sagini onanggipa sonani ghorikon palsrangna miksongaha.

Ua ghoriko palgipa dokan rangona re·roroe an·tangni ghoriko palbekeaha. Dokan damsani nokgipa uni ghorisonani ong·oba gitcheambeaha ine pa·sike uko tangka gong sotsni bonganasan brena bi·aha. Ua mikchi jingjeng jingjeng dakpile uko mol·molstape sonani ghoriko tangka gong sotchetna palaha.

Ua kusi ong·bee uni mikchae donbagipa sampilko brena re·angaha. Ua sampilara damni kri silbebeachim, indiba uni jagnini betonming apsan ong·nasipile gamchatachim. Ua sampilchi kni ken·node jikgipani knirang silbatginok aro ia silbegipa kenchongko nikon ua kusi ong·beginok ine chanchie ua kusi ong·ani aro chu·ongnikani mikchirangko ritok ritok dake ramao ga·akataha.

Krismasni attamo nambatsranggipa aro krabatsranggipa boksisko segipana on·na miksonge Dela an·tangni bilsi gimik chimonggimin tangkarangko December jani 24 tarikni pringo chane niaha. Uarang gimik gimang gong 80/-(sotchet) de ong·paaha. Segipani kam ka·na re·ongkatani jaman tapan ua kusi ong·bee antichi re·angaha aro ghorirangko palgipa dokanona re·ange dingtang dingtang silitingrangko basena a·bachengaha. Silitingrangni gisepo dingsa sonani silitingba uano gnangchim. Ua namen nina nitobeachim. Segipani sonani ghorina ua silitingan krabatsranggipa ong·aiginok ine nikeua uni

damko sing·aha. Paltingipa ua silitingni damko tangka gong 130/-(ritchasa kolatchi) mangmangsan ong·aiaba ine aganchakaha. Chong·motgipa sonani ong·ani gimin uni damko on·ti min·tiba ra·onna man·jaha. Je gita dam ong·oba ua uko brena miksongchong·motaha. Indiba tangka chu·ongjani gimin ua uko brena man·pajaha. Ua mikchi jingjeng jingjeng dake dokanoni ong·katbaaha. Maiba cholko dakna manpaengarok ine chanchie ua anti gimik reroroen kni rangko bregipa dokanko nike doneaha. Rangsanan ua an·tangni knirangko palna gisik tango miksonge dokanchi napangaha aro an·tangni silbegipa aro chamile ro·begipa knirangko watbrake mesokeming, “Angni knirangko nasimang baditana bregen?” ine sing·aha. Dokan nokgipa uni ro·begipa knirangko dongdike nie, “Nang·ni knirangko anga tangka gong 40/-(sotbri) nade bregen ,” ine aganchakaha.

Sonani silitingko brena da·ao tangka gong 50-(sotbonga) ko nangdapkuengachim. Uni knirangko paloba gong 10/-(chikking) kode nangdapkuengachim. Uni gimin ua dokan nokgipako an·tangni knirangko tangka gong 50/-(sotbonga) na mangmangde brepachina ine grappile molmolaha. Uni mikchirangni srusru dakpile jo·olengako nikon dokan nokgipa una ka·sachakbeaha aro uni bi·agitan uni robegipa knirangko rasote ra·e una tangka gong 50/-(sotbonga) ko on·ataha.

Segipani namnikbegipa uni nitobee robegipa knirangko palna gita ua kapakjaha. Uni ghorina sonani silitingko brena mangnok ine uie ua kusi ong””bee an·tangni basee donbagipa ua sonani silitingko tangka gong 130/-(ritchasa kolatchi) na breaha aro ka·tongtango chu·ongnikani aro katchabee ka·srokani uni nitobegipa mikronrangoni mikchirang srusru dake jo·olbapilaha. Ua gisiktango ka·srokbee nokona re·angaha aro skotangko barachi kotip kae segipani nokona re·baako sengsoaha. Adita ja·mano ua nokona re·baaha. Ka·tong katcha·ani aro ka·srokanian gapani gimin uni mikkang ua attamode skangona bate rongchingbatachim.

Ua jikgipani kotip kae rosoengako nikeon gisiko on·tisa dongto nikjaengjokchim, indiba uni kusi ong·bate dongsoengako nikon uni kotipni giminde chanchinan cholko manjaha. Maina sakgipinrangona bate kusi ong·bate aro ka·tong ka·srokbate jikgipa uni attamo segipako gipake ku·dime nokona rimchaksoaha. Ka·dingsmite ua chonbegipa kadepko jako ra·e,” Angni ia chonbegipa aro kragijagipa Krismasni boksisko ka·sapae ra·chakpa·bone,” ine aganeming uko segipani jako on·naha.

Jimiba uni attamode gisiko dingtangmancha kusi ong·ani aro ka·srokanian gape nokona sokarin jikgipako gipake ku·dime un baksa asongaha aro jikgipani silbee kotip ka·ako nitate kadingaha. Adita

somoina kingking jrip dongenba ua jikgipani mikkangko nitate aganna a·bachengaha,” Bilsi gimikoba anga nang·na maming mingnama boksisko on·na man·jani gimin anga gisiko namen duk onga.la chonbegipa bostuko anga nang·na Krismas boksisk dake ra·bara, ka·sapae na·aba ia gamchatgijagipa boksisko ra·chakbone,” ine aganeming an·tangni chola jeboniko gesa chongipa kadepko ra·ongkate jikgipani jako on·naha.

Delaan an·tangni Krismas boksisko oprake nichengaha. Ge·sa dam rakbegipa aro silbegipa sampilko nokon ua segipani an·tangna kasaani ning·tuaniko katongni mikgronrangchi niate ka·tongtangni ka·srokako donnuna man·jaha. Ua segipako gipakkotkote bi·sagita dake grapsrangaiaha. Je nitobegipa aro ro·begipa knirangko ken·china ia nitobegipa aro dam rakbegipa sampilko brebaahachim, da·aode uara indinsa ong·aignok. Una agreba antangni ro·begipa knirangko rasote palbaaha ine uijokode Jimi namen duk ong·beginok ine chanchieba ua grapbeaha.

Jikgipani mikchirangko u·site uko ka·dimeatani ja·mano ua jikgipani an·tangna on·gipa boksisko oprake niaha.Sonani silitingko nikon uaba an·tangni gisiko aro ka·tongo ka·srokaniko donnuna manjaha.Uaba jikgipako gipakkotkote grapbeaha. Maina je sonani ghoriko kae jakkalchina sonani dam

rakbegipa aro nitobegipa silitingko breahachim uara
indin ong·aiaha da·nang.Uni namnikbegipa ua sonani
ghoriko palaha ine uiahaode Dela namen duk
ong·beginok ine chanchibeaha aro grapbeaha.

Mikchitangko u·site aro ka·tongtangko
rakate,"Angni ka·sara Jimi kasapae angko ia
Krismasni attamo Gitel Jisuni bimungo kema
ka·pabo, anga nang·na ka·tongtangna bate ka·sara.
Uni gimin nangni sonani ghorina sonani silitingko
brena miksongaha.Uko brena dakon tangka
chuongjani gimin minggipin cholko manjae nangni
namnikbegipa angni knirangko rasote palbaaha," ine
aganeming an·tangni kotipko enge segipana
mesokaha aro uko gipake graptaiaha.

Jimiba mikchitangko u·site aro ka·tongtangko
rakate ," Dela, anga nangna namen ka·sara, uni gimin
mingsa gamchatbegipa boksisko nang·na brena
miksongaha. Nangni nitobegipa aro robegipa
knirangko kenchina nang·na ge·sa silbegipa sampilko
brena miksongahachim, indiba tangka chu·ongjaha.
Sonani ghorina batede naan angnade gamchatbatani
gimin anga uko pale nang·na ia sampilko breskaha,"
ine agane uamang rongtalgipa kasagrikani
mikchirangni chiringko ru·uten jokataha.Un salo
uamang saksa sakgipinna an·tangtango gnangaoni
nambatsranggipako Krismas boksisk on·grikaha.



SADUSA SAKGNI

West Bengalni badiaba damsa songo Dhiraj Rongma aro Mri minggipa sadusa sakgni gnanachim. Dhiraj sadutang dal·gipa Kolkata University – oni Msc. pass ka·ani jamano Mission skulo saksa skigipani kamko ka·e chapaengachim. Beton bangpajaoba nokgipa Isolni ka·saachi uamang pring attam salantian medikkode gualjachim.

Sadutang chongipa Kamal saksa badingchiwalna gisiko nangbegipa mande ong·achim. Bading chiwalen ua nokma cha·aha. Apal bigha hajalsana baten ua breaha. Tegatchuni baganrangba dam bongade dongpaaha. Nokkoba gadang gittam chue aro kutturi ge·sotbri dongple dalle rikaha. Mail bonga chel·laonin Kamal Mri dalan nokko boksogimgim dake niksengataiachim.

Dhirajni jikgipako Rikchi Nekola ine mingachim. Uaba Kolkata University – on M.A. pass ka·achim aro segipa baksa Mission skulo saksa skigipani kamko

ka·paengachim. Uamang jiksesean namen sontol, toromi, mandeskana ka·sabegipa aro noksulrangna on·ne sae cha·gipa manderang ong·achim. Skia manan baksanaba uamangni gisik ka·tong rongtalanigimin noksul songsulrangba uamangko manderabeachim.

Kamal gamtango pangchake saksa gaora dakdugagipa mande ong·achim. Ua sadutangko mande mingpaja birong chanpajachim. An·tango bolsni garirang donganigimin sadugipani rengrengsilo gae reako nikode ua ka·dingstekrongachim. Beton bangpajani gimin naya bonganaba gamchatgijagipa sadutang ineba chonike rorongachim. An·tang baksa chu ringrimjani gimin ua sadutangko nidikbatachim. Basakoba an·tangni nokmikkanggita sadutangni re·angako nirikode ua uko studape chonnike kalstape agane rorongachim.

Kamalni jikgipako Grikchi Nekola minga. Uaba abi gipa gitan Kolkata Universiton M.A. pass kaa. Abitang aro gumetangko ua namen mande rabea aro uamangna ka·sabeachim. Indiba sepipaan uamangko miknengbeachim, aro chonikbeachim. Uamamgna on·ne sae chapanaba onjachim. Segipani gisik gri dakani gimin ua gisiko namen duk manbeachim. Srik mittino abitangni nokchi reangako uijokode ua jikgipako a·ning knapknep dake maneng rongachim.

Salsao antioni nokchina re·bapilmitingo saoba Dhirajko gari salpake jak be·ate donangaha. Uko hospital done sanmitingo changsamang re·ange niani pal “Toromi dakdugaani gimin ang sadukode Isol dokpake jak be·atjokna,” ine ka·dingstekesachu ringe roaiachim. Naiasakoba ua dakchakna sikjachim. Jikgipani “cholgri apgri dakgiparangba basakobade nokma rajarangko dakchakna nangani sal sokbanaba gnang. Hai gumeko nina re·na,” ine kumongon, “naia bongamangmangba gamchatgijagipa manderangara nang·na mai dakchaniko on·paginok. Okkae cha·na manpajani giminan uamangni ki·gong dampode bilsa bonga ongomangba kiian gapkujanaba.” Ine chonikesa rosrangaiaha.

Nokgipa Isolni ka·saanichi aro doctor rangni bimchipe sannanichi Dhirajni jak be·gipa nampilaha. Da·aode ua skulchi re·na amaiaha. Sadugipani an·tangko jegita chonikoba, intekoba, an·tangko mande mingjaoba birong chapajaoba ua uni gisikgri dakako an·tang skia man·na ma·ate mamingchiba krujame tojaha. Uni bimungni ortoan “Chakchika” ine ong·a. Ua gitan ua namen chakchikrakhgipa ong·bebeachim. An·tangko chonik chepchepana ka·ao nanganipal batesa pringanti aro attamanti Isolo bi·chakrongachim.

Chu ringdugaani gimin Kamal T.B .saako man·naha. Ua an·chirarakosa wakgalsimaiaha. Uko

hospitalchi rimangna darangkoba sandion man·jaha.Uni ripengrang T.B. saa batna kenneming saksasaksa dake noktangtangchi re·angtokaha.Saksa sakgni re·bagiparangba cha·e ringe sriksrik re·angpiltokaiaha. Saksaba uko niangjaha. Jikgipa mangmansan uni sepango dongaiaha. Uni ripeng rangara gmikkan bottolni ripeng rarasa chim, saksamangba ka·tongni ripeng grichim.Jikgipa Grikchiba ua somoi chachaon an·tangna sal sokahani gimin segipako hospitalchi rimangna amjaengjokchim. Sakgnikon dingtang dingtang hospital rangchi ta·raken rimangna nangengjokchim.Indiba uamangko dakchakna gita darangba grichim. Uamango tangka sonarangde chu·ongana baten dongachim.Indiba, aiao inmanpile dukni somoio Kamalni ripengrangoni saksakoba mikkang nikjaha. Uni gimin Grikchi gisiko namen duk man·beaha.

Uamang jiksesani aiao inmanpile duko gaakengako nikon chakkol rangoni saksa uamangde sichongmotgnok ine nike sriksrik katange Dhiraj aro Rikchina aganeaha.

Sadugipa aro nosarigipani aiao inmanpile dukko ga·akengako knarin uamang jiksesaan rengreng silo gae chawatba·jolaiaha. Dhiraj sadugipako T.B.hospitalchi ta·raken ra·angaha aro Rikchi nogipako me·chikrangni hospitalchi ra·angskaaha.

Ian Krismasni attam ong·achim.Manderang Krismasko manina noktangtango nitoe taritokengachim. Indiba ia somoio Dhiraj aro Rikchide saksara sadugipako aro saksara nogipako duk mikchibaksa jakchakpilgija sanengachim. Dhiraj Kamalko ka·sae sanaha. Uni mitchi mitchok anchirara dake wakgala rangko aro uni ki·i su·burangko ua gale on·naha. Una agreba ua sadugipana gsik ka·tong gimikko Giten Jisu Kristoni ja·ao rugale bi·aha aro Gitel uni rongtalgipa aro kragipa boli on·naniko ra·chakaha aro Kamalko an·sengataha.

Uni walo ua sriksrik chu ringtaiaha. Salgipinno Krismasni salo ua bilongen sataiaha. “An·chi on·na man·jaode ia mande sichongmotgnok,” ine doctor aganaha. Uni gimin Dhiraj an·chitangkon sadugipana on·chakaha. An·chi on·na manjaode Kamal sichongmotgnokchim. Indiba sadugipa una kasabeanigimin ua an·tang sibokpileba una an·chi on·chake uni janggiko ripingaha. Ua sadutangni dakna nangako chusoksrange dakaha.

Dhirajni ka·sae nirokachi aro doctorrangni bimchipbee sanachi Kamalni T.B. saa namaha. An·tangni gamtango ka·donge sadugipako naia bonganigitaba gamchatgijagipa mande ine chonike studape kal·stape roarangko chanchiate Kamal sadutangna kratcha·beaha. Dhirajni jak be·e

hospitalo dongengako jikgipani nina ku·mongo sadutangko naia bongani gitaba gamchatgijagipa mande ine an·tangni chonikako ua jojrangjrang dakpile gisik ra·ataha. Aro jikgipani “Cholgri apgri dakgiparangba basakobade nokma rajarangko dakchakna nangani salrangba sokbanaba donga,” ine aganakoba gisik ra·ataha. An·tangni chansok pilgija tangka sonarang aro salanti sal wal ringrim cha·rimgipa ripengrang uni dukni salo naia sa gita mangmangba gamchatjaha. Indiba naia bongani gita mangmangba gamchatgijagipasa hirokna aro muktanaba bate angni dukni salo gamchatbataha ine ua namen ma·siaha. An·tangni sadu jakrako mande minggija birong changija daka rangko chanchiate nion ua an·tangko mandeni gadangoni namen onbatsranggipa gadangona tangonangaha ine ma·siaha. Mongsongbate ua sadugipani ka·tongni dal·ako aro uni rongtalako gisikni mikronchi rongtalen nikataha.

Gamtango pangchake gaora dake dongana batede sadu sade baksa ku·monge aro noksul songsul baksa nangrime donganian nambatsranggipa ong·a ine ua uina a·bachengaha. Pilakna bateba sadutangde ma·san ba·gipagita aro soksan cha·gipagitan chachan ong·chongmota ineba ua ma·siaha. Jawarangde angni alamala pring attam me·dik chanako nike una mikbue aro angni gamrangna mikbokesa uarangko ma·manti

cholrangchi rusie galnasa angko ripeng dakaia, indiba sadutangde apan ramako re·bagipa aro kni ja·chok sosirimgipa manchaan ong·a ineba ua ma·siaha. Angni dukni salo janggi tangko on·chakpile dakchakna chawatba·gipa sadutangna agre ia a·gilsako, ka·saani bazaro, ka·saani dokano, ka·saani rosgolarangko, sondesrangko aro jelibirangko, angni aiao inmanpile namgija dakanirangna kru jame toskagija angna indin chin·dambake on·gipa darangba gri ineba ua ma·siaha.

An·tangni gisikgri dakanirangko chanchiate ua gisiktango sadutangna kratcha·beaha. Ua Krismasni attamo hospitalni turamon an·tangni namgija dakbewalrangoni gisik pilaha, aro turamoni ka·sne chakate sadutangni jakrani ja·arango ga·ake maming kattakoba aganna changpilgija dake saksa chonbegipa bi·sa gita au·au grape sadugipao kema bi·aha. Gamtango pangchake gaora dakani na·gil be·grusrangaha. Ro·ong gita rak·gipa uni ka·tong da·alo chigita jrongsranggaha aro ua jo·olange Dhirajni una ka·sachakani sagalo brinesrangaha. Naia bongani gita mangmangba gamchatgijagipani aiao inmanpile chakchikani aro uni rongtalgipa ka·saanian bon·kamao chegipa ong·aha. Dhiraj uko salchroe gipakke ka·tongo katchaan suakpile grapbeaha.

Nokgipa Isolni ka·saachi Grikchi an·seng baljoken saksa silbegipa me·chik bisako jako

manpaaha. Uni gimin nokdango dongenggipa chakkol nokkolrang pilakkan kusi ong·beaha.

Kamalni bi·sa gita chacha au-au grape sadugipani ja·ao ga·akpile kema bi·ani gimin saksa chakkol mechikrangni hospitalchi re·ange Rikchi aro Grikchi ma·ang abisana agane on·eaha. Ia nambegipa kusini kattarangko knaon Rikchi kusi ong·bee nogipa Grikchiko gipakke kusi ong·ani mikchirangko tipchangatgija ka·siksikple ru·uten ong·ataha. Nokko dongenggipa chakkol nokkolrangba minggni nambegipa kobor rangko man·e kusi ong·tokaha.

Kamal kusi ongbe·e aro ka·tongtangko gisik pilani mikchirangchi su·srange gale mondolini manderangko aro pamongko an·tang nokona re·bae gilja ka·e an·tangna dingtangmancha nokgipa Isolo bi·chakangpachina aganepabo ine sadugipao mol·molaha.

Dhiraj uni mol·molagitan dakbebeaha. Gilja ka·mitingo ua an·tangni namgija dakbewalrangko kema ka·patokchina jinmao kema bi·aha aro grape an·tangko Gitel Jisu Kristona on·kangtaiaha. Uni an·tangko Gitelna gisik katong gmikchi on·kangako nike pilakkan kusi ongchake graptokkaha.

Salgipino ua dal·begipa alaniko dakaha. Noksul songsulrangba Kamal Mrini an·tangko Krismasni salo Gitel Jisu Kristona on·kangako nike kusi ong·chake

mikchi ong·tokpilaha. Uni an·tangko Gitel Jisu
Kristona on·kanganian uni jikgipa Grikchina, uni
abitang Rikchina aro sadugipa Dhirajna aro nokdango
dongenggipa sakantinan nambatsranggipa aro
gamchatbatsranggipa Krismasni boksisi ong·aiaha.





D. J. Publication

Educational Publishers

Ringrey, Tura, West Garo Hills (Meghalaya)